

PEDRO NANO ORETAGA RABE

Tuude cominimo Pedrodi cartana cuete

¹ ¿Nigacino? ¿Nie isoidomoi? Bie carta omoimo oredicue. Pedrodicue. Jiaie comini motomo birui itomoi. Ponto railla eniruemo itomoi. Galacia railla eniruemo itomoi. Capadocia railla eniruemo itomoi. Asia railla eniruemo itomoi. Bitinia railla eniruemo itomoi. Diga eniruemo omoi tuua jira, bie rafuena omoimo lloiacadicue. ² Naimie jitaillamona, cai Moo Jusiñamui omoina fetode. Naimie Joreñodi omoimo illamona, omoi comeciaina marebicaitate. Jesucristona omoi ñnollena, omoi jeacinomona omoi jilloillena, Jusiñamui omoina fetode. Jesucristo fiodailla jira, naimie diailla jira, naimie cominina jaidomoi. Jusiñamui omoina duenaillana uiñocana mai omoi jai. Jusiñamui omoina uri itatajana uiñocana mai omoi jai.

Jesucristo diga jaca cai illemo ocuiridicai

³ Naimiedi cai Nama Jesucristo ie Moo illanona, cai Moo Jusiñamuimo iobillacinona cai fecacabillesa. Naimie caina eo dueruillamona, naimiedi cai comeciaina raise ñnode. Fiodaillamona Jesucristo jillua jira, naimie diga jaca cai illena, ñnocana cai jaillemo jiai ocuiridicai. ⁴ Omoi ocuirillafuedi monamo ite. Faiñeitomoi; ia nainomo caimare marena jaca iitomoi. Jusiñamui iese omoina itataite. ⁵ Jusiñamuina omoi ñnua jira, naimie illanomo ico omoi illena, ie uaido naimiedi omoina birui sedade. Ico Cristo bia, iena raise uiñoitomoi. ⁶ Ieri iobidomoi; iadedi dallu diga rafuemona duere sefuidomoi.

⁷ Jiaie rafuedo iena lloiticue. Ero, ua oro raise omoi uiñollena, orona facacitomoi. Irai emodomo rainajamona, cocuillamona, gajamona, difai oro jai

fiebide. Iena “Mare” llotomoi. Oro eo raifide; iadedi jaca iñede. Ie isoide. Cristona omoi ua ñnuana facacillena, diga rafuemonu duere sefuidomoi. ñnocana omoi jaillamona, Jesucristo abido bille facaiseconi Jusiñamuidi omoina: “Mare” lloite. Omoi i eo iobite. ⁸ Jesucristona jaca cioiñedomoi; iadedi naimiena jai isiruitomoi. Naimiena jaca cioiñedomoi; iadedi naimiena jai ñnotomoi. Ie jira eo iocire itomoi. ⁹ Cristona omoi ñnuamona, jeacinomona jai jillobidomoi. ¹⁰ Jusiñamui facaina lloraini micoriaidi Jusiñamui omoina jai duenaillana jai e llotimaci. Jusiñamui omoina jilluana jai e llotimaci. Iena naimaci raise cacaiñenia, naiemo comeciaina facauidimaci. ¹¹ Cristo Joreño naimacina uiñotajamona, Cristona llotimaci. Cristo duere sefuillena llotimaci. Fiodaillamona naimie jilloillena jai e llotimaci. Monamo naimie abido jaillena llotimaci. Bumo iese ico suillena uiñoiacadimaci. Naie facaise illemo comeciaina jai e facadimaci. ¹² Jusiñamuidi naie rafue naimacimo duiñenana uiñotade. Naimacina naie rafue caimo duillana jai e uiñotade. Jusiñamui ie Joreñona monamona naimacimo oretajanona, ie uaido naimaci llumona, naimie facaina llorainimona bie mare rafuena birui jai cacadomoi. Jusiñamui jaienisai bie rafuena jai e raise uiñoiacadimaci; ia cai iso iena uiñoñedimaci.

Naimie jitaillacinona cai finollena, Jusiñamui caina fetode

¹³ Ie jira omoi comeciari raise marena fino. Ebona jaiñeno. Jesucristo abido bia, Jusiñamui omoina jai jilloitajana ua raise uiñoitomoi. Iemo iocire ocuiri. ¹⁴ Jusiñamuina omoi nia uiñoñena facaise dani omoi comeciari jitaile rafuedo jaisoidomoi. Naimiena omoi jai ñnuu jira, naimiena omoi nia uiñoñega facaise finoca rafuedo birui omoi jaiñeno. Mare uruiari imaci moo uaina

ñnotimaci. Jusiñamui uruiaina omoi jai illa jira, naimie uaina ñno. ¹⁵Jusiñamui ie uruiaina omoi illena, jai omoína fetode. Naimie mareuilla jira, marena omoi i. ¹⁶Iena naimiedi jaie cuetate: “Cue mareuidimiena isoi, marena omoi i”.

¹⁷ Cai Moona Jusiñamui illamona, naimiemo birui jidomoi; iadedi juez isoi nagamiemo ico Jusiñamui llua jira, nana omoi ille dinori jacirucana omoi jai. Nagamiena ie marañede finoca rafue diese duere finoite; ia marañede rafuena finoñedimiena duere finoñeite. ¹⁸ Omoi einamaci rafuedo jaie jaisoidomoi. Naie rafue jamaifue. Naifuemona Jusiñamui omoína jai jillotate. ßbatajamona omoi jeacinomona jillotañede. Ucubedi raire cueruide. Raire cueruide ra diga omoína jillotañede; ¹⁹ iadedi Cristo diruedo naimie dacaiño fiodalmona, omoína jaca jillotate. Cai comini imaci jeacino facaina mare toica llaudana fauidimaci; ia Cristomo jeacino iñena jira, cai jeacino facaina birui dacaiño fiodaite. ²⁰ Caina jilloitallena, enirue nia iñena facaiseconi Jusiñamui Cristona jaie fetode. Naimiema omoi uiñolena, birui bene eniruemo Jusiñamui naimiema oretate. ²¹ Cristo muidona Jusiñamuina ñnotomoi. Cristo fiodaite; ia iemona Jusiñamui naimiema jillotate. Ie mei monamo ie ecimo naimiema dane itatate. Ie jira Jusiñamuina ñnotomoi. Omoi fiodaia, dane jilloillemo jiai jai ocuridomoi. ²² Uanaicinona omoi ñnuamona, omoi comeciai jai jeanidimaci. Ie muidona jiaie creyentiaina isiruicana omoi jai. Omoi comeciama conini omoi isirui. ²³ Jusiñamui cominina jai jaidomoi. Naimie uaido iese jaidomoi. Comini uaido iese jaiñedomoi. Naimie uai jaca fuiñeite. Jaca iite. Naie uaido naimie cominina jaca iiticaí. ²⁴ Jusiñamui facaina lloraima micori iena jaie cuete:

Nana cominidi raiticiai isoidimaci.

Safia dallu ebirede; iadedi raiticiai ie safia diga are iñede. Ie isoide. Diga rafuena finuanona, dallu iticai. Are iñedicai; ²⁵ iadedi Jusiñamui uai jaca ite cuete. Naie uaidi mare rafue. Naie rafuena birui jai cacadomoi.

2

¹ Jusiñamui cominina cai illa jira, jiaie cominina gaiñenacinona fainonocai. Nana jifuiacinona fainonocai. Abina caitajacinona feita. Nana abi uradoillacinona feita. Jiaie comini joreñona ñaiñeno. ² Ero, raise moonaillena, raise ecairellena, janosa monoï ijina jitaide. Ie isoide. Omoi comeciai raise marena illena, Jusiñamui rafuena jitaidomoi. ³ Cai Nama omoïna duenaillana jai omoi uiñuamona, naimie uaina ñinocana jai.

Cristodi jofomo ite nanoca nofici isoide

⁴ Ie cominina raise omoi illena, Jusiñamui rafuena finocana jai. Naimie omoïna jai fetode. Naimiemo omoi raise duillana jitaide. Iena omoi raise uiñollena, jiaie rafuedo iena lloiticue. Naimiedi jofona niacade isoide. Noficimona niacade. Diga noficina jitaide. Naimie naie noficiaina jai fetode. Nanoca nofici diga naie jofo nillana tainede. Cristodi naie nanoca nofici isoide. Cai nairai Cristona jaie jitaiñedimaci; iadedi Jusiñamuimona naimie maredimiena jira, Jusiñamui naimiena fetode. Caidi jiaie noficiiai isoidicai. Ie jofona nillena isoillena, Jusiñamui caina fetode. ⁵ Naimiena cai jai ñnua jira, naimie cominina jai jaidicai. Naimie diga jai atona ñairedicai. Naimie diga jiaie comini facaina jiai ñaicabiticai. Naimiena cai raise sedallena, Jesucristo caina canuamona, Jusiñamui jitail-lacinona finocana jaidicai. ⁶ Jusiñamui facaina lloraima iena jaie cuela:
Ero, Jerusalémo cue jofona nillena, daje noficina fe-toiticue.

Eo mare noficina fetoiticue. Cue Jitona ñaiticue.
 Naimiena jai fetodicue. Naimiedi eo mare.
 Naimiena ñinuamona, comini iobitimaci
 cuega. ⁷ Naimiena omoi ñinoia, Jusiñamui omoina io-
 bitaite. Naimiena omoi ñinoñenia, faifitomoï. Jusiñamui
 facaina lloraima micori iena jaie cuega:
 Jofona ñinoraini jitaiñena noficidi nana naie jofomo ite
 noficiái baifemo jai faiga
 cuega. Ie isoide. Cai nairai Cristona jitaiñede; iadedi
 Jusiñamui naimieri eo iobide. ⁸ Dane cuega:
 Nine naimaci macaria, naie noficimona eicaitaillamona,
 uaitimaci
 cuega. Cristona cuete. Cristo uaina naimaci ñinoñena jira,
 Jusiñamui llua isoi faifitimaci.

Pedro Jusiñamui fetocanona llofuate

⁹ Jusiñamui jai fetocanodomoï. Naimiemo omoi jai
 duillamona, naimie diga atona ñairedomoï. Jusiñamui
 ua cominidomoï. Naimiena omoi nia ñinoñenia, jeacino
 anamo omoi illa jira, jitiredinomo itomoï isoidomoï.
 Naiemona omoina jai jillobitade. Naimie anamo jai omoi
 illamona, useredinomo jai itomoï isoidomoï. Eo mare
 rafue omoimo naimie ñinua jira, iena llocana omoi jai.
¹⁰ Jaie Jusiñamui cominiñedomoï; iadedi birui Jusiñamui
 cominidomoï. Naimie omoina duenaillana jaie uiñoñe-
 domoï. Birui iena uiñotomoï.

*Pedro Jusiñamui jitaillacinona finocana cai jaillana llo-
fuate*

¹¹ Cue isiruiganodomoï. Jusiñamui illanomo omoi birui
 jainaiaila jira, eniruemo jaca iñeitomoï. Eniruemo jaca
 omoi iñena jira, jeacinona finocana jaiñeno. Jeacino
 omoi comeciaina namataacana jira, iena ebiruiñeno, naie
 anamo omoi i raillano. ¹² Jusiñamuina ñinoñedino mo-
 tomo omoi illamona, mare rafuena finocana jai. Omoina

birui jeare ñaitimaci; iadedi omoi marena illana naimaci uĩñuamona, Jusiñamuina ico naimaci iinoia, naimiemo iobillacinona fecaitimaci. ¹³ Cai Namamo omoi duilla jira, illaicomini anamo raise i. Riai diga omoi nanoca illaĩma uaina iino. ¹⁴ Naimacina omoi illaicomini fetua jira, omoi gobernadores uaina iino. Maraiñede rafue omoi finoia, omoĩna duere finoitimaci; iadedi mare rafuena omoi finoia, omoĩri iobitimaci. ¹⁵ Jusiñamuidi mare rafuena omoi finuana jitaide. Iena omoi finua jira, omoĩna ebena ñaitino uaina lliicaitaitomoi. ¹⁶ Jusiñamui anamo cai illamona: “Jiaie illaĩma uaina iinoñeiticai” raiñeiticai. Cai enirue illaĩma uaina cai iinoñenia, jeacinona finodicai. Jusiñamui dibeimo cai illa jira, naimie jitaillacinona finocana cai jailli. ¹⁷ Nana cominimo marena fino. Nana creyentiaina isirui. Jusiñamuina jaciruoicaida iino. Riai diga omoi illaĩma uaina iino.

Cristo duere sefuilla rafuemona fueoiticai

¹⁸ Patrón anamo damierie itomoi. Omoi patrón ocuica uaina iinocana omoi jai. Omoi patrón marena fecuise ocuica, naimie uaina iino. Naimie raire iciria, naimie ocuica uaina jiai iino. ¹⁹ Maraiñede rafuena omoi finoñenia, omoi patrón omoĩna duere finoia, Jusiñamuimo omoi comeciaina facajanona, ibana oñeno. Ibana omoi oñenia, Jusiñamuimona mare. ²⁰ Maraiñede rafuena omoi finoia, omoi patrónona duere sefuitomoi; iadedi maraiñede rafuena omoi finoñenia, omoi patrón omoĩna duere finoia, ibana omoi oñenia, Jusiñamuimona mare. ²¹ Duere omoi sefuia, ibana oñeno. Iese omoi illena, Jusiñamui omoĩna fetode. Cristo cai facaina ibana oñeno duere sefuide. Naimie isoi cai illena, naimie isoi rafuena finocana cai jailli. ²² Naimiedi maraiñede rafuena jaca finoñede. Tainona jaca lloñede. ²³ Comini naimiena jeare ñaitimaci; iadedi naimiedi uai oñede. Naimie duere sefuide; iadedi: “Omoĩna ico duere finoiticue” raiñede.

Naimiedi Jusiñamui naimacina ico raise duere finollena uinote. ²⁴ Cruzmo naimie fiodaillamona jeacino anamo cai inellena, cai jeacino facaina naimie fiodaite. Jusiñamui jitailla isoi naimie fiodaite. Naimie jai duere sefuilla jira, cai jeacinomona jai jillodicaí. ²⁵ Sedañega toica llaudaiaí isoi jaie ebena jaisoidicaí. Cai sedaraíma anamo jai iticaí. Naimiedi cai comeciaina jai eenote.

3

*Pedro*di inirediñaiñuaina, airedino diga llofujete

¹⁻² Inirediñaiñuái, omoímo jai lloiacadicue. Omoí iniñiaí uaina ino. Nibai birui Cristo rafuena inoñedimaci; iadedi omoí marena illamona, Cristo díbeimo naimacina itataitomoí. Jusiñamui uaina omoí inuamona, omoí marena illamona, damierie Cristona inoitimaci. ³ Dañaiñorie abina eo finocabidimaci, naiñaiñuaina jiaie comini ebinallena. Naiñaiñuái ifotiena eo finocabidimaci. Eo raifide rana jítacabidimaci. Eo ebirede raifide iniroina jítacabidimaci. Naie isoide ra comecina marena itatañede; ia Jusiñamui jitaillacinodo jaillamona, comeci marena ite. Jiaie comini omoína ebinaí raillano, iese omoí ineno; ⁴ iadedi jiaie comini omoína ebinallena, omoí comeciái marena fino. Omoí iniñiaí uaina oñeno. Naimaci jitailla rafuena fino. Omoí comeciái iese ia, Jusiñamuimona eo mare. ⁵ Cai jaiagai facaise Jusiñamuína inotiñaiñuái iese itimaci. Cue birui llofuía isoi, naiñaiñuái abina jaie finodimaci. Naiñaiñuái iniñiaí uaina inotimaci. ⁶ Iese Sara micorí ie ini Abraham micorí uaina innote. Ie anamo naiñaiño illa jira, ie ocuica uaina jaca innote. Mare rafuena finocana omoí jaia, buena omoí jaciruiñenia, naiñaiño isoi iitomoí. Iemona naiñaiño uruaina jaitomoí isoitomoí.

⁷ Airedino, omoímo jai lloiacadicue. Omoí ainiaímo comeciaina faca. Cai isoi naiñaiñuái mairiñena jira,

naiñaiñuaina isiruillamona, naiñaiñuaina marena raise seda. Jusiñamui omoina duenaillamona, naimie cominina jai jaidomoi. Omoina jai jillotate. Omoi ainiaina omoi raise sedañenia, Jusiñamuimo daajena raise jiinidomoi.

Cristo ðibeimo cai illa rafue

⁸ Daje isoi comeciai lloicana jai. Coninina duenai. Naga creyentena isirui. Jiainona cano. Abina iedoñeno.

⁹ Omoina jiaie comini duere finoia, ibana oñeno. Omoina naimaci jeare ñaia, ibana oñeno; iadedi naimaciri marena ñaino. Mare rafuena cai finollena, Jusiñamui caina fetode. Iese cai jaia, Jusiñamui dinena: “Mare” caina raite.

¹⁰ Jusiñamui facaina lloraima micori iena jaie cuega:

Marena uri jaca bu iacania, jeare ñaiñeno.

Tainona lloñeno.

¹¹ Jearede rafue finuana fainonocai. Mare rafuedo jai.

Omoi ecimo itino ðiga, uri icana omoi jai.

¹² Naimie jitailla rafue omoi finoia, Jusiñamui iena uiñuamona, omoina raise sedade.

Naimie ðiga omoi ñaia, iena cacade;

iadedi maraiñede rafue bu finoia, Jusiñamui naimie ðiga icirite.

¹³ Mare rafuena omoi finocana jaia: “Maraiñede rafuena naimaci finua jira, naimacina duere finoiticaí” rainidimaci; ¹⁴ ia mare rafuena omoi finuamona omoi duere sefuia, Jusiñamui omoina canoite. Omoina duere finodinona jaciruiñeno. Jarire iñeno; ¹⁵ ia omoi comeciai jitaillamona Cristona seda. Naimiedi cai Nama. “¿Bue ñellena Cristona innotomoi?” omoimo bu jicanoia, uaina raise ono. Fecuisse iciriñeno, uaina ono. ¹⁶ Mare rafuena finocana jai. Omoina jiaino jeare ñaia, mare rafuena omoi finocabillamona meidaitimaci. Omoi marena illamona, tainona naimaci lluaña bairenite. ¹⁷ Mare rafuena omoi finuamona, Jusiñamui jitaillamona omoi duere sefuia, dama iese duere sefuitomoi; ia maraiñede rafuena omoi

fínuamona omoi duere sefuia, omoi muidona. ¹⁸ Cristomo omoi comeciaina faca. Dacaiño cai jeacino facaina naimie fiodaite. Naimie mareuidimie; iadedi maraiñedino facaina fiodaite. Jusiñamui dibeimo caina itataiacade. Naimiena meinetimaci; iadedi naimie Joreño jaca ite. ¹⁹ Ie Joreñodo naimie jaillanona, jaie fiodaitino imaci joreñuai eenoranomo ie finoca rafuena lluaide. Naimaci nia fioidañenia, Jusiñamuina jaca iñoñedimaci; ia Cristo ie finoca rafuena naimaci joreñuaimo lluaide. ²⁰ Jusiñamui rafuena jaie iñoñedimaci. Noé micori facaise Jusiñamuidi naimaci naimiena iñuamo fecuise ocuride. Jinuimona jillobillena, Noé micori ie balsana finode. Ocho digamie jillobidimaci. ²¹ Ie isoide. Omoi bautizaia: “Jusiñamui dibeimo jai iticai” llotomoi. “Jeacinomona jai jillobidicai” llotomoi. Omoi abimo ite jearenamona jillobiñedomoi; iadedi omoi comeciai jai marena ite. Fioidaillamona Jesucristo jillua muidona, jillobidicai. ²² Naimie jillua mei, monamo abido jai jaide. Jusiñamui ecimo naimie illamona, Jusiñamui uai naimiemo ite. Nana Jusiñamui jaienisai naimie anamo jai itimaci. Taifena Jesucristo anafefilla jira, Jesucristo anamo naimie ite; ia naimiena nia janafefitañede.

4

Jusiñamuimona cai feiñoga uai diga, naga jiaie creyentena cai canua

¹ Cai isoi naimie illamona, Cristo duere sefuide. Naimie duere sefuide; ia jeacina finoñede. Duere omoi sefuia, naimie illamo omoi comeciaina faca. ² Nana omoi ille dinori comini jitaillacinodo jaiñeno; iadedi Jusiñamui jitaillacinodo omoi jai. ³ Jusiñamuina uiñoñedino isoi jaie bie isoide rafuena finouidomoi: Omoi añede riñoniai diga isoidomoi. Omoi iniñede iññiai diga isoidomoi. Jearede rafuena ebiruitomoi. Jifairuidomoi. Jiruana ebiruitomoi.

Jusiñamui rairuica jiraraina sedavidomoi. ⁴ Naie isoide rafuena omoi jai finoñenia, Jusiñamuina uiñoñedinodi omoiñi rajicaidimaci. Omoina jeare ñaitimaci. ⁵ Iese itimaci; iadedi Jusiñamui uicomo ico iitimaci. Naimacina duere finoite. Nia fioidañedinona duere finoite. Jai fioidaitinona jiai duere finoite. ⁶ Naimaci nia fioidañena facaise, Jesucristo rafuena cacadimaci. Jeacino muidona nana fioidaitimaci; iadedi naimaci navui ñnoia, naimaci joreñuai, Jusiñamui isoi, jaca iitimaci.

⁷ Bie enirue raire fuite. Ie jira ebena jaiñeno. Comeciaina raise faca. Jusiñamuimo raise jaiñena, iese omoi jai. ⁸ Coninina isiruicana omoi jai. Omoi isiruillacino jiaie rafue baifemo faite. Jiaimie diga nicino ia, naimiena omoi isiruillemona, naicinona raire feitaitemoi. ⁹ Jiaie cominina jafueoicaida feiñoñeno; ia caimare feiño. ¹⁰ Creyentiaina omoi jailla facaise Jusiñamuimona omoi uaina feiñotomoi. Naimie dibeimo omoi maijillena feiñotomoi. Nagamiemo daje isoide uai iñede. Omoi uai diga, naga jiaie creyentena cano. ¹¹ Cristo rafuena bu llofueia, Jusiñamui naimiemo llua isoi, naimie llofuia. Jiaie creyentena bu canoia, naimiena Jusiñamui canuamona, naimie canua. Jusiñamuina cai iobitallena, nana cai finua rafuemono Jesucristo mamecido iese cai jailla. Illaimana naimie illamona, caina jaca sedade. Naimiemo iobillacinona jaca cai fecacabillasa. Iena jitaidicue.

Cristo dibeimo cai illamona, duere sefuiticai

¹² Cue isiruiganodomoi. Eo duere omoi sefuia, rajicaiñeno. Creyentiaina omoi jailla jira, duere sefuitomoi. Jusiñamuidi Cristona raise omoi ñnuana facacite. ¹³ Cristo jai duere sefuide. Naimie isoi omoi duere sefuia, ieri iobi. Naimie dane bene bia, naimie bairiari eo iobitomoi. ¹⁴ Creyentiaina omoi illamona, omoina bu jeare ñaia, caimare omoi i. Iemona Jusiñamui Joreño omoimo illana

uiñoitomoí. Naimie: “Mare” omoína raite. ¹⁵ Jiainodi cominina meinetimaci. Rana fiidimaci. Maraiñede rafuena finodimaci. Naimacimo duide rafuena abimo oñeno. Naie isoide rafuena bu finoia, duere sefuite. Iena omoí finoñeno. Naie isoide rafuena omoí finuamona omoí duere sefuillana jitaiñedicue. ¹⁶ Creyentiaína omoí illamona omoí duere sefuia, ieri meiruiñeno; iadedi creyentiaína omoí illamona, iobillacinona Jusiñamuimo fecá.

¹⁷ Jeacino facaina Jusiñamuidi comini birui duere finocabide. Jeacino facaina ie cominina nano duere finode. Ie mei naimie cominiñedinona duere finode. Naimie cominina cai illamona, caina janore duere finoite; iadedi naimie cominiñedinona cai baifemo eo duere finoite. ¹⁸ Jusiñamui facaina lloraima micori iena jaie cueda: “Mareuidinodi niadedi jillobiñedimacimo, ¿niese comeciaina jearedinodi jillobitimaci? ¿Niese maraiñedinodi jillobitimaci? Nibai jaca jillobiñeitimaci” cueda. ¹⁹ Iena omoí uiñuamona, mare rafuedo jai. Jusiñamui jitaillamona duere omoí sefuia, mare rafuedo jai. Jusiñamui caimo finuana omoí uiñuamona, naimie anamo raise i. Naimie omoína raise eenoite. Ie lloga uaina jaca finoite.

5

Pedro creyentiaína nia llofuate

¹ Creyentiaína llofueraini, omoimo rafuena lloiacadicue. Cuedi jiai llofueraimadicue. Cristo fiodallana ciodicue. Naimie ebire abido bia, jiaie creyentiaí diga iena cioiticue. Iese cue illamona, omoimo lloiacadicue. ² Omoí anamo ite creyentiaína raise seda. Naimacina raise llofue. Jiaimie railla jira, llofueñeno; iadedi omoí jitailla jira, llofue. Rana ollena llofueñeno; iadedi iocire llofue. ³ Omoí anamo itinona riire llofueñeno; iadedi mare rafuedo omoí jaillamona,

naimacina llofue. ⁴ Cai creyentiai nanoca sedaraimadi Cristo. Naimie abido bia, naimiemona ibana feiñoitomoï. Naimie diga jaca iitomoï.

⁵ Conirueni, omoï llofueraini uaina raise iino. Coninimona abina iedoñoeno. Jusiñamui facaina lloraima micori iese jaie cuega:

Bu abina iedoia, Jusiñamuimona maraiñede;
iadedi bu abi iedoñenia, Jusiñamuimona mare.

Jusiñamui naimiena duenaite
cuega. ⁶ Iese illa jira, cai Jusiñamui siñona jira, naimie anamo abina iedoñoeno mai raise omoï i. Iemona naimie jitailliruido omoïna iobitaite. ⁷ Nie isoide rafue ia, Jusiñamui omoïna canocabillana omoï uiñuamona, omoï comeciai jarire finoñoeno. Naimie omoïna eenoite.

⁸ Ebona jaiñoeno. Jeacino finuamo abina rairui. Taife caina ramo faicabite. Janallari ie rille jenua isoi, Taife omoïna jenocabide. Jeacino omoï finuana jitaide. ⁹ Naimie ra faia uaina iinoñoeno; ia Cristona iinocana jai. Omoï duere sefuilla isoi, nana jiaie creyentiai duere sefuidimaci. Iena omoï uiñuamona, omoï comeciai ocuiño-cana jai. ¹⁰ Cai Jusiñamui caina eo duenaite. Cristomo jai cai duilla jira, Jusiñamui illanomo ico jaca iiticaï. Dallu birui duere cai sefuia, Jusiñamui cai comeciaina raise finoite. Cai comeciaina raise ocuiño-taite. ¹¹ Illaimana naimie illamona, caina jaca sedade. Naimiemo iobillacino cai fecacabillasa. Iena jitaidicue.

Naga creyentiaimo carta oria rafue

¹² Silvanona uiñotomoï. Naimiena bie cartana cuetataticue. Cristomo naimie duilla jira, cue ama isoi naimie ite. Cuemona naimiedi raise iinogamie. Omoï dine oretallena, janorede cartana cuetataticue. Bie rafuena dane lloiacadicue: Bie rafuedi Jusiñamui ie. Naimie caina duenaillana omoï uiñuamona, bie rafuena iinocana jai.

¹³ Babiloniamo ite creyentiaí omoi dine imaci uaina oredimaci. Naimacina Jusiñamui jai fetuamona, creyentiaina jaidimaci. Marcos ie uaina jiaí orede. Cristomo naimie jai duilla jira, naimie cue jitona eruaide. ¹⁴ Conini omoi isiruillamona, nana creyentiaina eo caimare uaido. Cristomo jai omoi duilla jira, naimie omoi comeциаina uri itatajana uiñocana mai jai. Macaibaite. Pedrodicue.

Jusiñamui uai: Jusiñamui jito rafue illa rabenico
New Testament in Huitoto, Murui (PE:huu:Huitoto, Murui)

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 14 Jun 2022 from source files dated 28 May 2022

145a1f66-dca1-5de3-9c00-4e533605e488